

Carta chí unì nacahyí Juan nuú na cúu cuéntá Jesús

Cáhan Ndióxi Juan xihín in da naní Gayo

¹Yehe cúu u in da sacuahá ta cáhyí i carta yóho nu mún ñani mání, da naní Gayo. Ta mé a ndaa quíhvi ndusa ini i yohó.

²Candehé, ñani mání, da cúu cuéntá Jesús. Xíca tahví i nu Ndióxi ña ná quiahva mé á tá nuú ña vaha nuun. Ta ná caja mé á ña ná a quíhvun ta já coo vaha inún tá quiahva íin vaha inún xihín Ndióxi. ³A juú quiahva ná cajii íní i tá naquixi java na cúu cuéntá Jesús yóho ta nandicani na nuú i ña co cáxoún nuú ña ndaa jáchi cája tá cájún ña. ⁴A juú quiahva cajii íní i tá ñéhe e tuhun ña xíca ndó íchi cuéntá ña ndaa jáchi mé ndó cúu ndó tátuhun jahyi i.

⁵Candehé, ñani mání. Vaha ndivaha cájún jáchi xihín ndinuhu inún chindeún na cúu cuéntá Jesús tá saa na jan vatí cúu ná na quíxi ñuu tóho. ⁶Ta nu tóco ndihi na táca veñuhu yóho ndícani mé na tóho ndá quiahva quíhvi ndivaha inún na. Ña cán quéa xíca i ñamaní nu yohó, Gayo ña ná chindeún na tá ná saa tucu na cán ta ná quiahvún ña ndímaní nu ná cañehe na íchi cūhun na jáchi ña yóho cúu á ña cajii ini Ndióxi xihín. ⁷Ndítahan chindeún na jáchi naqueta na xíca nuu na cája na chuun cuéntá Jesucristo ta co cūni na caca na ñaha catacu na nuú na co cúu cuéntá Jesús. ⁸Sahá ña cán quéa ndítahan nu mí, na cúu cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáhan na ña ndaa xihín ñayivi.

Cuachi cája in da naní Diótfes

⁹Sa nachindahá i in carta nu tóco ndihi na cúu cuéntá Jesús ndúu jan joo Diótfes coo naxeen da cándusa da ña cáchí nde. Jáchi cája cáhnu da mé dá ta cūni da cacuu da jini nu tóco ndihi na cúu cuéntá Jesús ndúu jan. ¹⁰Sahá ña cán quéa tá ná saa i jan caxi tuhun i nuun sahá ña cája da jáchi xíca nuu da cáhan ndivaha da ña tuhún sahá nde. Ta a juú ña yóho cuití cája da, vaha jáchi ni co cūni da ndiquehe da na cúu cuéntá Jesús xínu coo

3 JUAN

jan. Ta sájí nuu da nuú na cúni ndiquehe vaha ñahá ta janda táxi da na veñuhu.

¹¹Candehé, ñani máni. A cajún ña núu tá quiahva cája Diótrefes jan. Xíní ñúhú cajún ndinuhu ña vaha jáchi da cája ña vaha cúu dá cuéntá Ndióxi joo da cája quini co xíní da Ndióxi.

Ña vaha cája Demetrio

¹²Joo tóco ndihi na cúu cuéntá Jesús cáhan vaha na sahá da naní Demetrio jáchi ña ndaa cuití va cája da. Ta quiahva já cáhan vaha ri ndehe va sahá dá ta cándaa inún ña cáhan nde ña ndaa.

Ndíndayí Juan Gayo

¹³Mé a ndaa íin cuahá ndivaha ñaha cúni cáhan i xuhun joo co cúni cahyí i ña nuú tutu yóho ¹⁴jáchi cúni cuni yachi i yohó já ná nditúhún yúhu mí i xuhun.

¹⁵Ña xíca i nu Ndióxi quéa ná caja mé á ña ná coo vaha inún. Na cúu cuéntá Jesús ndúu yóho chindahá na Ndióxi coún. Ta cajún ñamaní cáhan Ndióxi lohún xihín in in na cúu cuéntá Jesús ndúu jan.